

**Piniartut aalisartullu piffissap ilaanni inuuniarnikkut ajornartorsiulerminni  
pisortanit ikiorserneqarsinnaanerisa pitsaanerulernissaat siunertaralugu  
sulisoqarnissaanik Naalakkersuisut peqquneqarnissaannik Inatsisartut  
aalajangiiffigisassaattut siunnersuut**

*(Inatsisartunut ilaasortamit Hans Aronsenimit, Inuit Ataqatigiit, saqqummiunneqartoq)*

**pillugu**

**Ilaqutariinnermut Ataatsimiititaliap**

**ISUMALIUTISSISSIONAA**

**Aalajangiiffigisassatut siunnersuutip aappassaaneerneqarnerani saqqummiunneqartoq**

Ilaqutariinnermut Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit  
Inatsisartunut ilaasortaq Jane Petersen, Inuit Ataqatigiit  
Inatsisartunut ilaasortaq Astrid Fleischer Rex, Demokraatit  
Inatsisartunut ilaasortaq Ruth Heilmann, Siumut  
Inatsisartunut ilaasortaq Aleqa Hammond, Siumut

Ulloq 6. november 2009-mi siullermeerinerup kingorna siunnersuut una Ilaqutariinnermut Ataatsimiititaliam erseqqinnerusumik naliliiffigisassanngorlugu innersunneqarpoq. Siunnersuutip sukumiinerusumik misissorneqarnissaa Ilaqutariinnermut Ataatsimiititaliap pisariaqartippaa, tamatumalu kingorna siunnersuutip aappassaaneerneqarnissaa UPA 2010-mut, tamatumalu kingorna UKA 2010-mut kinguartinneqarluni kingusinnerpaamillu UPA 2011-imut.

**Siunnersuut pillugu**

Maleruaqqusat atuuttut malillugit pisortanit ikioriissutinik pisartagaqarnissaminut piniartut aalisartullu periarfissaqaraluartut inuit ilaqtariillu piniarnermik aalisarnermillu inuussutissarsiuteqartut maleruaqqusani pisariaqarneratut naammattumik

**UPA 2011/22**

1

LABU j.nr. 01.25.01/11FM-LABU-00022/  
LABU j.nr. 01.25.01/10EM-LABU-00054

eqqumaffiginiarneqanngitsut siunnersuuteqartup oqaatigaa. Aalisartut piniartullu pisortanit ikiorserneqarsinnaanerisa pitsaanerulernissaa kissaatigigini siunnersuuteqartup siunnersuutip qulequtaatigut oqaatigaa. Aammattaaq inunnut nunami suliffilinnut sanilliullugu pissutsit immikkut ittut aalisartunut piniartunullu atuuttut maleruaqqusani atuuttuni pisariaqarneratut naammanngitsumik eqqumaffiginiarneqanngitsut siunnersuuteqartup oqaatigaa. Piffissami sivikinnerusumi sivisunerusumiluunniit piniarnissamut aalisarnissamulluunniit periarfissaqanngippat aalisartut piniartullu ima inissisimagajuttarput inuussutissarsiornerminni atortuminnik aserfallatsaaliillutillu nakkutilliisariaqarlutik, tamannalu pissutigalugu inuit allat assigalugit suliffeqarnikkut piareersimanissartik ajornartittarlugu, tamatumalu saniatigut piniartoqarfinni arlalinni suliffissanik allanik innersuussisoqarsinnaaneq ajorluni. Tamatuma saniatigut piniartut ingerlatsinermut siumoortumik akilerneqartussanik annertuumik aningaasartuuteqarsinnaasarpus. Taakku assersuutigalugit tassaallutik orsussaq patronillu. Tamakku tunngavigalugit aalisartut piniartullu pisortanit ikiorserneqarsinnaanerisa pitsaanerulernissaa pisariaqartinneqartoq siunnersuuteqartoq isumaqarpoq.

### **Siunnersuutip siullermeerneqarnera**

Siunnersuut ulloq 6. november 2009-mi siullermeerneqarpoq, tamatumani partiit, Inatsisartunut ilaasortat Naalakkersuisullu siunnersuummut oqaaseqartartullu ataasiakkaat saqqummiussaannut oqaaseqarnissaminnut periarfissinneqarlutik.

**Naalakkersuisut** akissuteqaammanni oqaatigaat pissutsit arlaqartut pissutigalugit siunnersuut ilusimisut iluseqartoq tapserneqarsinnaanngitsoq. Ilaatigut Akileraartarneq Atugarissaarnissarlu pillugit Isumalioqatigiissitap isumaliutissiissutaa utaqqimaarniarneqarpoq, tassani isumaginninnikkut maleruaqqusat nalilersorneqassammata, tamatumalu saniatigut pitsuussutsip Kalaallit Nunaanni pissutsit malillugit qanorpiaq paasisariaqarnera Isumaginninnermut Naalakkersuisoqarfimmit misissorneqarluni ingerlanneqarmat. Aammattaaq aalisartut piniartullu kisimik pinnatik aammali innuttaasut sinneri, tassunga ilanngullugit inuussutissarsiornermik ingerlataqartut piffissami sivikinnerusumi sivisunerusumiluunniit imminnut pilersorsinnaanngikkunik pisortanit ikorsiissutit pillugit maleruaqqusat aqqutigalugit ikorsiissutinik pissarsinissaminnut periarfissaqarmata Naalakkersuisunit immikkut erseqqissaatigineqarpoq.

**Inuit Ataqatigiit** oqaaseqartartuata saqqummiussaani oqaatigineqarpoq pisortanit ikorsiissutit pillugit maleruaqqusanut atatillugu aaqqiissutissanik suliniuteqarnermi nunatsinni inuuniarnikkut atugassarititaasut inuussutissarsiornermilu perarfissat assigiinngitsuunerat eqqumaffigineqartariaqartoq. **Inuit Ataqatigiit** akissuteqaammut isumaqataapput aammalu Akileraartarneq Atugarissaarnissarlu pillugit Isumalioqatigiissitami

suliaq, tassunga ilanngullugu nunap immikkoortuini ineriertortitsinikkut iliuusissat utaqqimaarniarlugit.

Pisortanit ikorsiissutit pillugit maleruaqqusat atuuttut eqqarsaatigalugit piniartut aalisartullu ajornartorsiutaat taaneqartut inatsisitigut aalajangersimasumik immikkullarissumillu suliniutigineqarnerat siunnersuutikkut siuarsarneqanngitsoq, tamannalu pissutigalugu siunnersuut taama iluseqartillugu **Siumumit** akuerineqarsinnaanngitsoq **Siumup** oqaatigaa. Taamaattorli siunnersuutip Inatsisartut ataatsimiitaliaanni erseqqinnerusumik suliarineqarnissa pisariaqartoq **Siumut** isumaqarpoq, taamaalluni ajornartorsiutit pineqartut nalilersorneqarsinnaaqqullugit. Siunnersummi ajornartorsiutinut aaqqiissutissat **Siumumit** equeersimaartumik sulissutigineqarnerat nangeqqinniarneqarpoq.

Piffissani aalajangersimasuni imminut ilaqtarisanillu pilersuisoqarsinnaasoqartinnagu sulisussarsiarineqarsinnaaneq eqqarsaatigalugu inuussutissarsiutilinnut sulisartunulluunniit maleruaqqusanik assigiinngitsunik atuutsitsisoqarnissaanik isumassarsiamut **Demokraatit** isumaqataanngillat. Inatsit tamanut assigiimmik attuuttariaqartoq **Demokraatit** isumaqarput. Aamma taamaappoq pisortanit ikorsiissutit pillugit maleruaqqusat eqqarsaatigalugit. Akileraartarneq Atugarissaarnissarlu pillugit Isumalioqatigiissitat suliaata inerner **Demokraatinit** utaqqimaarniarneqarput, tunngavissallu taamaatsillugit siunnersuut tapersersinnaanagu.

Inuussutissarsiornermik ingerlatallit isumaginninnikkut ikorserneqarnerulernissaat aallunnagu aalisarnermik piniarnermillu inuussutissarsiutitigut pissutsit nukittorsarneqarnissaat siunnersummi aallunneqarsimassagaluartoq **Atassut** isumaqarpoq. Innuttaasut allat piffissani sivikinnerusuni sivisunerusuniluunniit imminnut pilersorsinnaajunnaartut assigalugit aalisartut piniartullu pisortanit ikorsiissutinik pissarsiaqarnissamut ullumikkut periarfissaqareersut **Atassutip** oqaatigaa. Tamatuma kingunerisaanik siunnersuut **Atassummit** taperserneqanngilaq. Aammattaaq kommunit maleruaqqusanik atuuttunik eqqortumik aqutsinissaat qulakteerniarlugu Namminersorlutik Oqartussat kommuninik suleqateqassasut **Atassummit** erseqqissaatigineqarpoq.

Siullermeinerup nalaani partit Naalakkersuisullu siunnersuut taama iluseqartillugu tapersinngikkaat, taamaattorli aalisartut piniartullu inuussutissarsiornerminni atugaat annertuumik oqallisigineqartut oqaatigineqarsinnaavoq. Siunnersuut siullermeerneqarmat Ilaqtariinnermut Ataatsimiitaliami suliarineqartussatut innersuussinermik naammassineqarpoq.

**Ilaqutariinnermut Ataatsimiititaliap siunnersummik suliarinninneranut atatillugu ataatsimiinnerit**

**KNAPK-p ulloq 17. maj 2010-mi ataatsimeeqatigineqarnera**

KNAPK-p ilaasortamik pisortanit ikorsiissutit pillugit maleruaqqusani misilittagaat pillugit ilisimasaasa tusarneqarnissaat siunertaralugu Ilaqutariinnermut Ataatsimiititaliap KNAPK ulloq 17. maj 2010-mi ataatsimiinnissamut aggersarpaa.

Pisortanit ikorsiissutit pillugit maleruaqqusat imaani inuussutissarsiutinut atugassarititaasunik aallaaveqaratik nunami inuussutissarsiutinut atugassarititaasunik aallaaveqarnerat KNAPK-mit ajornartorsiutigineqartoq KNAPK-p siulittaasuata oqaatigaa. Maleruaqqusat silap pissusaanut naleqqussarneqartariaqartut siulittaasup aamma oqaatigaa, tassami aalisartut piniartullu atugarisaat allanngorsimammata. Ukiut kingulliit ingerlanerini ilaasortat ilaqtuttaminnek pilersuinerminnek qulakkeeriniarnertik ajornartikkaluttuinnaraat siulittaasumit aamma paasissutissiissutigineqarpoq. Aammattaaq aalisartunut piniartunullu nuliaasut isertitaat pissutigalugit aalisartut piniartullu amerlasuut pisortanit ikorsiissutinik pisartagaqarnissamut itigartinneqartartut paasissutissiissutigineqarpoq.

FN-ip isumaqatigiissutaa innersuussutigalugu siulittaasoq isumaqarpoq pissutsit assigiinngitsut pissutigalugit aalisarnissamut piniarnissamullu periarfissaqartoqartinnagu aalisartut piniartullu imminnut pilersornissaminnut pisortanillu ikorsiissutinik pisartagaqarnissaminnut periarfissaqartariaqartut.

Pisortanit ikorsiissutit pillugit maleruaqqusat kommuninit assigiinngitsumik aqunneqartut KNAPK-mit ilisimaneqartoq KNAPK-mit uppernarsarneqarpoq.

**Sulisussarsiarineqarsinnaanermik apeqqut ajornartorsiortitsivoq**

Pisortanit ikorsiissutit pillugit maleruaqqusat eqqarsaatigalugit pingaartumik sulisussarsiarineqarsinnaanermik apeqqut ajornartorsiortitsisoq ataatsimiinnermi aamma oqaatigineqarpoq.

Aalisartut piniartullu sulisartunut allanut sanilliullutik sulinerminni atukkamik immikkullarissuunerat pissutigalugu kommunimi "suliffissarsiortutut naqitsinnissartik" ajornartorsiutigisinnasaraat oqaatigineqarpoq. Piniartoq ullut ilaanni suliffissarsiortutut/suliffeqarnermi sulisussarsiarineqarsinnaasutut nalunaarsortissinnaavoq, tamatumalu peqatigisaanik ulloq taanna aqaguaniluunniit silagitsillugu piniariarsinnaasarluni.

**Isumaginninnermut Naalakkersuisoqarfíup ulloq 23. april 2010 ilusiliineq pillugu allaffissornikkut ataatsimeeqatigineqarnera**

Pingaartumik aalisartut piniartullu pisortanit ikorsiissutinik pisartagaqarnissamut periarfissaat eqqarsaatigalugit pisortanit ikorsiissutit pillugit maleruaqqusat atuuttut ilusiliinikkut inatsisilerinikkullu paasisaqafiginerunissaat siunertaralugu pisortanit ikorsiissutit pillugit maleruaqqusani aalajangersakkat attuumassuteqartut inatsisilerinikkut/ilusiliinikkut misissorneqarnissaannik Ilaqtariinnermut Ataatsimiititaliaq Isumaginninnermut Naalakkersuisumut qinnuiginnippoq.

**Isumaginninnermut Naalakkersuisoqarfíup ulloq 30. september 2010 ilusiliineq pillugu allaffissornikkut ataatsimeeqatigineqarnera**

Isumaginninnermut Naalakkersuisup kaammattuuteqarneratigut pisortanit ikorsiissutit pillugit maleruaqqusat ilusilerneqarnerat pillugu erseqqissaataasumik ulloq 30. september 2010 ataatsimiittoqaqqippoq. Aalisartut piniartullu eqqarsaatigalugit sulisussarsiarineqarsinnaanermik oqariaaseq pisortanit ikorsiissutinik pisartagaqartussanut allanut assigiimmik atuunnerata aalajangersarneqarnissaa ataatsimiinnermi Naalakkersuisoqarfimmit siunertarineqarpoq.

Tamatuma kingorna aalisartut piniartullu pisortanit ikorsiissutinik pisartagaqartut allat assigalugit kommunimit aggeqqusissummik tigusaqarnermik kingorna ullup unnuallu ataatsip ingerlanerani suliffeqarnikkut sulisussarsiarineqarsinnaassapput.

**Ilusiliineq pillugu ataatsimiinnerit eqikkarneqarnerat.**

Pisortanit ikorsiissutit pillugit maleruaqqusani aalajangersakkat pineqartut inatsisilerinermut tunngasortai saqqummiutinngikkaluarlugit oqaatigineqarsinnaavoq:

Aalisartut piniartullu ajornartoornermi pisortanit ikorsiissutinik pisartagaqalernissaannut tunngatillugu pisortanit ikorsiissutit pillugit maleruaqqusat qanoq paasineqarnissaat kommuninit ajornartorsiutigineqartoq ulloq 23. april 2010-mi ataatsimiinnermi aalajangiunneqarpoq. Taamatuttaaq ikorsiissutinik tunniussisarnermi tamatumalu annertussusissaannik kommunit assigiingiliaartunik periuseqarput. Ajornartorsiutigineqartoq tamanna Naalakkersuisoqarfimmit arlalitsigut suliniuteqarnikkut ikiorserniarneqarpoq:

1. Ilitsersuutinik kommuninut atuutilersitsinikkut taakkunatigut pisortanit ikorsiissutit pillugit aalajangersakkat, kommunit paasinninniarnerminni ajornartorsiutigajuttagaasa paasineqarnissaannut erseqqissaasoqarluni.

2. Pingaartumik aningasat nammineq atugassat qanoq isumaqarnersoq paasinissaa kommunini ajornartorsutigineqartoq Naalakkersuisoqarfik naliliivoq, matuman i aalisarnermik piniarnermillu inuussutissarsiuteqarnermut immikkut inuutissarsiornikkut atugassarititaasunut atatillugu. Ajornartorsiummi matuman i aningasat tigusartakkat pillugit eqqortumik qanoq paasineqarnissaanut siunissami ilitsersuusiassap ersarissarneqarnissaata qanoq aaqginneqarsinnaaneranut ikuutaasinnaasoq Naalakkersuisoqarfimmit eqqarsaataavoq.
3. Inatsimmik misissuinertert pisortanit ikorsiissutit pillugit inatsisip kommuninit qanoq aqunneqarnerat pillugu nakkutilliinermik Naalakkersuisoqarfik ingerlatsilersaartoq oqaatigineqarpoq. Nakkutilliineq tamanna ingerlanneqarsinnaavoq Naalakkersuisoqarfimmit kommuninut sulianik misissuartortitsinikkut. Taamatuttaaq suliat misissugassanngorlugit Naalakkersuisoqarfip kommuninit nassiutsissinnaavai.
4. Kommunit pisortanit ikorsiissutit pillugit inatsimmik aqtsinerat pillugu paassisutissanik annertunerusunik Naalakkersuisoqarfik katersereerpat inatsit naleqqussarlugu suliaq aallartinneqassaaq.
5. Piareersimanerup nalaani piniartut inuussutissarsiutigalugu allagartaannik kommunit arsaarinnittarnerat inatsisitigut tunngavissaqanngitsoq aammattaaq Ilaqutariinnermut Ataatsimiitaliamila ilaasortat maluginiarpaat.
6. Naalakkersuisoqarfimmit misissuinerit aallartinneqartut inernertert pillugit ataatsimiitaliaq ilisimatinneqarumaartoq aammattaaq Ilaqutariinnermut Ataatsimiitaliamila ilaasortat maluginiarpaat.

Ulloq 30. september 2010-mi ataatsimiinnermi kommunimit aggersaassummik tigusaqarnermit ullup unnuallu ataatsip ingerlanerata iluani aalisartut piniartullu piareersimasussaatitaanerat malitseqartitsilluni erseqqissaassutigineqarpoq. Tamanna ima isumaqarpoq piareersimanissamik pisussaaffik naammassineqassappat aalisartoq/piniartoq ullormik unnuamillu ataatsimit sivisunerusumik piniariaqqusaanngillat/aalisariaqqusaanngillat.

#### **Ulloq 22. oktober 2010-mi ataatsimiitaliap naalakkersuisumik apersuinera.**

Ilusiliineq pillugu ataatsimiinnerit siunnersuullu ilusimisut iluseqartoq tunngavigalugit apeqqutit makku nassuaataannik pissarsinissaq siunertaralugu Naalakkersuisunut ilaasortaq apersorneqarluni ataatsimiinnissamut Ilaqutariinnermut Ataatsimiitaliamit aggersarneqarpoq:

- A)** Suliniutinik aalajangersimasunik sunik aallartitsisimasoqarnersoq ilusiliinerlu pillugu ataatsimiinnermi ajornartorsiutinut oqaatigineqartunut atatillugu siunissami sunik ingerlatsisoqarniarnersoq ataatsimiititaliap Naalakkersuisumut apersuinerani nassuaatigeqqullugit Ilaqtariinnermut Ataatsimiititaliap Isumaginninnermut Naalakkersuisoq qinnuigissavaa. Ilusiliineq pillugu ataatsimiinnermi qulaani allassimasut saqqummiunneqartut nassuaammi iluaqutaasumik aallaavigineqarsinnaapput.
- B)** Aalisartut piniartullu inuunerminni atukkaminnik attassiinnarsinnaaqqullugit pisortanit ikorsiissutit pillugit Inatsisartut peqqussutaanni piumasaqaatit oqilisaavagineqarnissaat ataatsimut isigalugu Isumaginninnermut Naalakkersuisoq suliniuteqalersaarpa? Tamanna UKA 2010/54-imut siunnersuummut atatillugu siunnersuuteqartup kissaateqarneratigut.

Isumaginninnermut Naalakkersuisup apeqqutit A) aamma B) ima akissuteqarfingai:

**A-mut tunngatillugu.**

*Ilaqtariinnermut ataatsimiititaliap kissaatigaa ataatsimiinnerni siuliini taaneqartuni ajornartorsiutit saqqummiunneqartut aallaavigalugit piviusumik suliniutinut tunngatillugu siunissami Naalakkersuisut suut naammassiniarlugit pilersaaruteqarnerannik nalunaaruteqarnissaq.*

*Kinguliiniittut nalunaarutigineqarsinnaapput:*

*Pisortanit ikorsiissutit pillugit inatsisartut peqqussutaanut ilitsersuut ersarissarneqassaaq aaqqissuunneqarlunilu. Eqqortumik paasineqarnissaanut paatsoorutaasinnaasut erseqqissaaffigineqassapput. Pilersaarutigineqarpoq ilitsersuut aaqqissuunneqarsimasoq naammassineqarsimassasoq 2010 naatinngagu.*

*Pisortanit ikorsiissutit pillugit inatsisartut peqqussutaannut ilitsersuummi qanoq atuinissamik paasinninnissamut tunngatillugu nassuaat ersarissarneqassaaq. Aammattaaq inatsisit qanoq nassuiarneqarnissaannut assersuutit ilitsersuummut ilangunneqassapput.*

*Pisortanit ikorsiissutit pillugit inatsisartut peqqussutaannut ilitsersuummut immikkullaressumik ilangunneqassaaq immikkoortoq, tassani kommunit ilitsersorneqassallutik i-sumaginninnermi malittarisassat sulinermi qanoq atortinneqarnissaannik, erseqqissaavigneqassallutillu makkua:*

1. pisortanit ikiorserneqarnissamik pisariaqartitsinerup nalilersorneqartarnera (missingersuineq),
2. sulilernissamut piareersimanissamik pisussaaffeqarnerup nalilersorneqarnera,
3. suliamik paasissutissiineq (pisortatigoortumik periuseqarneq),
4. inatsisitigut tunngavissanut apeqqut tunngasoq (inatsisinik malinninneq) kiisalu
5. suliamik ingerlatsinermi malittarisassat.

*Pissutsini ataasiakkaani ikiorserneqarnissamut ilumut pisinnaatitaasoqarneranik piviusumik nalilersuineq tunngavigineqartarpoq aammalu sulilernissamut piareersimanissamik pisussaaffik naammassineqarsimansoq. Taamaattumik kommunini missingersuissaq, suliaq qulaajassallugu aammalu ikiorserneqarnissamik pisariaqartitsineq sulilernissamut piareersimanissamik pisussaaffimmik naammassinnissimaneq nalilersortussaallugit.*

*Isumaginninnermi malittareqqusani sulilernissamut piareersimanerup nalaani inuussutissarsiutigalugu piniarnermut allagartap upternarsaatip arsaarinnissutiginissaanut inatsisitigut tunngavissaqaanngilaq. Inuussutissarsiutigalugu piniarnermut allagartap uppernarsaatip annaaneqarsinnaaneranut aalajangersakkat inatsimmi allami allassimapput.*

*Naalakkersuisoqarfiup isumaginninnermi aqtsineq aamma aaqqissuuussaaneq pillugu inatsisartut peqqussutaanni § 1-i, aammalu tamanna pillugu malittareqqusat allassimanngitsut, malillugit nakutiginnittussaatitaanini ingerlappaa. Naalakkersuisoqarfiup misissueriaatsini allanngortiterlugit ingerlappai pisortanit ikorsiissuteqartarnerup iluani ilaatigut qinnuteqaatit aalajangersimasut piniartut aalisartullu pisortanit ikiorserneqarnissamik qinnuteqaataasa misissorneqarnissaasa qulakteerneqarnissaat siunertaralugu. Misissuisarnerup allanngortinnejarnissa pillugu naalakkersuisoqarfiup iluani ilitsersuutip atugassaq suliarylugu aallartinneqareerpoq.*

### **B-mut tunngatillugu.**

*Aalisartut piniartullu inuuniarnikkut atugassarisaasa oqilisaassisiffigineqarnissaat siunertaralugu pisortanit ikorsiisarneq pillugu inatsisartut peqqussutaani piumasarineqartut oqilisarneqarnissaannut apeqqummut tunngatillugu atuuppoq, piniartut aalisartullu aalajangersimasumik akiligassanut ikiorserneqarnissamut aammali pisortanit inuuniarnerminni ikiorserneqarnissamut innuttaaqataasunut allanut atugassarititaasut assigalugit aamma piginnaatitaaffeqarnerat. Ikorsiissutit tunniunneqartarput ataasiakkaat immikkut nalilersuiffigineqarneratigut inuuniarnermut pisortanit ikorsiissutitut aammalu aalajangersimasumik aningaasartuutinut akiliutissatut, takuuk peqqussummi § 4 aamma imaluunniit ataasiakalaartumik aningaasartuutinut ikorsiissutitut, takuuk peqqussummi § 20.*

Pisortanit ikorsiissutit naatsorsorneqassapput qinnuteqartut ataasiakkaat aalajangersimasumik aningaaasartuutaasa, pilersuinissamik pisussaaffisa il.il. missingersorneqarnerat aallaavigalugu. Tamatigut aningaaasat tunniunneqartassapput ilaqtariit nerisassa-qarnissaannut allanullu pisariaqartitaannut akiliutissatut naammattut. Pisortanit ikorsiissutit naatsorsorneqarnerannut atatillugu tamatigut immikkut isiginiarneqartassapput meeqqat pisariaqaritaat.

Pisortat ikorsiissutaannik tigusinissamut piumasaqaataavoq ikorsiinermik atorfissaqartitsineq (§ 20), taassuma tigunissaanut piumasaqaatinik naammassinnissimanissaq (§ 4) aammalu sulilernissamut piareersimaneq (§ 8). Tamatumunnga naliliineq ingerlanneqassaaq ataasiakkaanik nalilersuiffigineqarneratigut ikiorserneqarnissamut ilumut pisin-naatitaaffeqarnersoq, saaffiginninnerit ataasiakkaat tamaasa aallaavigalugit. Pisortanit ikorsiisarneq pillugu peqqussut aallaavigalugu aalajangersimasumik inuussutissarsiutillit ingerlatallit aalajangersimasut arlaannaalluunniit siumut allanit sallutinneqassanngillat. Saaffiginnissutit tamarmik nalilersorneqassapput aallaavigalugu missingersuineq, ilumut ikiorserneqarnissamut pisussaaffeqarnersoq aammalu atugassiissutinut pisussaaffinnik naammassinnissimanersoq.

Naalakkersuisut eqqarsaatigingilaat aalisartut aamma piniartut innuttaaqataasunut allanut sanilliullugit immikkut pitsaanerusumik pineqartalernissaannik inatsisitigut tunineqarnissaat. Akerlianilli ajornartorsiu Akileraartarneq Atugarissaarnerlu pillugit Isumalioqatigiissitamut, isumaginninnikkut akiliutaasartut aammalu inuiaqatigiinni aningaaasarsiornik-kut inunnut eqqorneqarnerpaanut akiliutaasartut ataqtigisiinneqarnissaannik suliassa-qarfilmmit Naalakkersuisut saqqummiussimavaat.

#### **Ulloq 18. marts 2011 KANUKOKA-mik ataatsimeeqateqarneq**

Pisortat ikorsiissutaat pillugit ilitsersuutip nutarterneqarsimasup nalilersornissaa siunertaralugu Ataatsimiititalip KANUKOKA ulloq 18. marts 2011 ataatsimiigiaqquaa.

KANUKOKA-p ilisimatitsissutigaa ilitsersuut nutartigaq 7. januar 2011 avammut saqqummiunneqartoq. Tamanna Ilaqutariinnermut Ataatsimiititaliap tusaatissatut tiguaa.

KANUKOKA-p ilisimatitsissutigaa ilitsersuut nutartigaq pitsanngorsarneqarnikuusoq er-seqqinnerulersinneqarlunilu, pingaartumik aalisartut piniartullu pillugit immikkoortoq 10.6. Ilitsimatitsissutigineqarporli namminersortut sulisullu pillugit nassuiaanermi suli paasumiinaatsoqarsinnaasoq. Ilaqutariinnermut Ataatsimiititaliap inassutigaa KANUKOKA, kommuunit aamma Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik ingerlaavartumik oqaloqatigiittarlutik nalornissutaasinnaasut piaartumik er-

seqqissassagaat ilitsersuullu ingerlaavartumik aaqqiivigarlu, taamaalilluni atoruminartuu-niassammat allaffisornermilu atorsinnaaniassammat.

KANUKOKA-p ataatsimiinnermi ilisimatitsissutigaa kommunini sullisisut ilitsersuut nutarti-gaq pillugu suli pikkorissartinnejarsimannngitsut.

Ilaqtariinnermut Ataatsimiitaliaq isumaqarpoq kommunini sullisisut piaartumik pikko-ris-sartinnejartariaqartut, taamaaliornikkut pisortat ikorsiissutaat pillugit malittarisassat allaf-fisornermi assigjiaartumik atorneqarnissaat qulakkeerneqarsinnaaqquullugu.

**Isumaginninnermut, Kultureqarnermut, Ilageeqarnermut Naligiissitaanermullu Naalakkersuisumik ulloq 18. marts 2011 apersuineq.**

Pisortat ikorsiisarnerat pillugu ilitsersuut nutartigaq pillugu nassuaatitsiniarluni Isumagin-ninnermut, Kultureqarnermut, Ilageeqarnermut Naligiissitaanermullu Naalakkersuisoq ulloq 18. marts 2011 apersuinissamat Ataatsimiitaliap qaaquaa.

Naalakkersuisumik apersuinermi upternarsarneqarpoq aalisartut piniartullu pillugit immikkut immikkoortoq ilitsersuummi nutartikkami ilanngunnejarsimasoq, taamaalilluni taakkua pisortat ikorsiissutaannik pinissamat periarfissaqarnerat ersarissisinnejarluni. Pisortat ikorsi-isarnerat pillugu ilitsersuut nutartigaq pillugu KNAPK ulloq 4. februar 2011 ilisimatinneqar-poq.

Naalakkersuisumik apersuinermi ilisimatitsissutigineqarpoq ilaatigut pisortat ikorsiisarnerat pillugu ilitsersuut pillugu pikkorissartitsinissamat KNAPK 2011-imi immikkut qaaqquneqarumaartoq.

Ilaqtariinnermut Ataatsimiitaliami ilaasortat Naalakkersuisumik apersuinermi oqaatigaat, pisortat ikorsiisarnerat pillugu malittarisassanut tunngatillugu aalisartut piniartullu assigiom-mik pineqartarnissaat qulakkeerneqassasoq.

Ilitsersuut nutartigaq pillugu isumasioqatigiittoqassanersoq aperineqarami Naalakkersuisup oqaatiga tamanna immikkut pisariaqartutut isigineqanngitsoq, tassa pisortat ikorsiisarnerat pillugu malittarisassat allanngortinneqaratik ilitsersuut allanngortinneqarmat. Naalakkersuisup oqatiga ilitsersuut nutartigaq pillugu pilersaarutigineqartutut pikkorissarneqarnissamik pingaartumik sullisisartut pisariaqartitsisut.

Ilaqtariinnermut Ataatsimiitaliami ilaasortanit oqaatigineqarpoq namminersortunut tunngatillugu pisortat ikorsiisarnerat pillugu malittarisassat nassuiarneqarnerat taamaalillunilu allaf-

fissornikkut atortinneqarnerat pillugu KANUKOKA-mit paasissutissiissutigineqartut malillugit apeqqutilliisoqartarsimasoq.

Naalakkersuisup oqaatigaa kommunini sullisisartut ilitsersuut atorsinnaasariaqaraat, taassumalu kingorna pissutsit aalajangersimasut pillugit Naalakkersuisoqarfik ingerlaavartumik ataveqarfingineqarsinnaassasoq KANUKOKA-millu suleqateqarusuttoq. Ilitsersuummi iluarsiisutissanik, ilanngussassanik pitsannguutinillu pisariaqartitsineq ingerlaavartumik nalilersorneqartarpoq. Ilitsersuummi malittarisassiornerup paasiuminartuunissa siunertaralugu skemap atorneqarsinnaanera Naalakkersuisup Ilaqutariinnermut Ataatsimiititaliamit kajumissaarneqarluni aamma misissorumavaa.

Ilaqutariinnermut Ataatsimiititaliamit ilaasortat oqaatigaat ilitsersuut pillugu innuttaasunut immikkut paasissutissiinissaq pisariaqartinneqartoq, tassunga ilanngullugu pingaartumik aalisartut piniartullu pisortat ikorsiissutaannik pissarsisinnaanerisa periarfissaqarnera. Avinngarusimasuni nunaqarfinnilu innuttaasunut immikkut paasitsinsiaanissaq Ilaqutariinnermut Ataatsimiititaliamit ilaasortat malillugit naleqquttorujussuuvoq.

### **Ilaqutariinnermut Ataatsimiititaliap oqaaseqaatai**

Aalisarnermik piniarnermillu inuussutissarsiutip iluani suliassat ataatsimiititaliamit erseqqinnerusumik oqaluuserineqanngimmata Ilaqutariinnermut Ataatsimiititaliap aallarniutigalugu oqaatigissavaa, pissutsit taakku oqalliffinni allani siunnersummillu matumanit allaanerusumik ilusilimmik suliarineqartussaammata.

Tamatuma kingunerisaanik aalajangiiffigisassatut siunnersuummi naalakkersuinikkut anguniakkat kisiisa Ilaqutariinnermut Ataatsimiititaliap misissorpai taakkulu pisortanit ikorsiissutit pillugit maleruaqqusanut atuuttunut sanilliullugit.

Inuussutissarsiornermik ingerlatallit siunnersuummi pineqartut – tassalu aalisartut piniartullu – eqqarsaatigalugit oqaatigineqarsinnaavoq pineqartut taakku sulinermi atukkatigut, suliatigut, suliamik ingerlatsinikkut akissarsiatigullu assigiaanngimmata. Taamaattorli aalisartut piniartullu Kalaallit Nunaanni eqqaanilu isumalluutinik uumassusilinnik pinngitsuuisinnaanngillat, tassungalu ilanngullugu piniagassat, soorlu pisassiissutit nikerernerat, atortussat silallu pissusaa apeqqutaatillugit.

Aalisarnermik piniarnermillu inuussutissarsiuteqartut ilisarnaatigaat isertitat aningaasartuutillu nikerartuummata aammalu piffissat ilaatigut siumut naatsorsoruminaatsuummata.

Pisortanit ikorsiissutit pillugit maleruaqqusani komunit aqtsinerisa assigiaarsimanninnerat Ilaqutariinnermut Ataatsimiititaliamit assut ilungersunartutut isigineqarpoq. Pingaartumik sammivinnit arlalinnit uppernarsarneqarpoq maleruaqqusat aalisartunut piniartunullu ajornartorsiortitsisut. Kattuffiup ilaasortai eqqarsaatigalugit maleruaqqusani aqtsinerup assigiaannginnera pillugu Ilaqutariinnermut Ataatsimiititaliap KNAPK-mik ataatsimeeqateqarnera paasissutissiiffiullunilu uppernarsaataavoq.

Aalisartut piniartullu piffissani imminut pilersorsinnaaffiunngitsuni innuttaasut allat inuussutissarsiutinillu ingerlataqartut allat assigalugit pisortanit ikorsiissutinik pisartagaqarsinnaatitaammata ersarilluinnarpoq. Inuussutissarsiutinik immikkut ittunik aningaasalersuinissamut pisortanit ikorsiissutit atorneqassanngillat, taamaallaalli innuttaasunik imminut pilersorsinnaanngitsunik ikorsiinissamut isumaginninnikkut tunngavissaassallutik.

Pisortanit ikorsiissutit pillugit maleruaqqusat tamanut assigimmik atuutissasut aammalu maleruaqqusat taakku aqqutigalugit innuttaasut ilaat eqimattakkutaalluunniit immikkut inuussutissarsiutillit immikkut ikiorserneqartassanngitsut Ilaqutariinnermut Ataatsimiititaliaq tunngaviusumik isumaqarluinnarpoq, naak maleruaqqusat aalajangersimasumik missingiilluni naliliinissamut periarfissiigaluartut.

Tamatuma kingunerisaanik siullermeerinermut atatillugu siunnersummik ataatsimut isigalugu naliliineq Ilaqutariinnermut Ataatsimiititaliami amerlanerussuteqartut attatiinnarpaat, tamatuma kingorna aalisartut piniartullu inuunerminni atukkaminnek attassiinnarsinnaaqqullugit pisortanit ikorsiissutit pillugit Inatsisartut peqqussutaanni piumasaqaatit oqilisaavigineqarnissaasa Naalakkersuisunit sulissutigineqarnissaat akuerineqarsinnaanani.

Taamaattorli aalisartut piniartullu suliffissaarusimasutut naqitsisarnissaat taamaallillutillu suliffeqalernissamut piareersimanerat qanoq aaqqissuunneqassasoq periaatsimik atoruminarnerusumik nassaarnissamut Naalakkersuisut suliaqaqqullugit Ilaqutariinnermut Ataatsimiititaliap ataatsimoorluni kaammattussavai. Periuseq tamanut assigiissumik atuutissaaq inuutissarsiornermilu immikkut atugassarititat nunallu immikkoortuisa assigiinngissusaat aalisartunut piniartunullu atuuttut eqqarsaatigineqartariaqarput. Suliamti KNAPK aamma KANUKOKA akuutinneqassapput.

Ilaqutariinnermut Ataatsimiititaliaq isumaqarpoq aalisarnermik piniarnermillu inuussutissarsiuteqartut piffissap ilaanni inuuniarnermikkut ajornartorsiulerminni pisortanik ikiorserneqartarnissaat allatuulli inuussutissarsiuteqartutut pingaaruteqartigisoq. Ilaqutariinnermut

Ataatsimiisitaliaq isumaqarpoq nunatsinni inuuniarneq inuiaqatigiinnut tamaginnut toqqissimanartumik ingerlanneqassasoq, pisariaqavitsillugulu pisortanik ikiorneqartarnissaq periarfsaajuaannassasoq. Ataatsimiisitaliaq isumaqarpoq pisortat ikorsiissutaat Inatsisartut aalajan-gersagaat tassaassasut inuiaqatigiinnut sulerusutitsilersut, inuillu ataasiakkaat inuutissarsium-mik ingerlakkusutaannut ikorfartuisut.

Ilaqtariinnermut Ataatsimiisitaliaq isumaqarpoq nunatsinni isorartoqisumi nunami imaani lu inuutissarsiortut periarfissaasa naligiissumik inuutissarsiummullu naapertuutumik ingerlan-neqassasut. Ataatsimiisitaliaq isumaqarpoq nunatsinni inuussutissarsiutit assigiinngitsut pius-sassut, tamannalu aallaavigalugu inuussutissarsiutit aamma aaqqissuuussaanikkut ineriertortin-neqarnissaat pinngitsoorneqarsinnaanngitsoq.

Maleruaqqusat innuttaasunut tamanut assigiimmik aqunneqarnissaat ersarinnerulersinniarlugu maleruaqqusanut atuuttunut ilitsers  
uummik      nutartikkamik      Naalakkersuisut      suliaqarsimanerat      Ilaqtariinnermut  
Ataatsimiititaliamit tusaatissatut tiguneqarpoq.

Aammattaaq ilusiliineq pillugu ataatsimiinnernut atatillugu oqaatigineqartut Ilaqtariinnermut Ataatsimiititaliamit tusaatissatut tiguneqarput aammalu ataatsimiinnernit taakkunanit oqaatigineqartut innersuussutigissallugit.

Aammattaaq inuussutissarsiutinik ingerlatallit, tassunga ilangullugit aalisartut piniartullu, sulisartut allallu pisortanit ikorsiissutinik pisartagaqarnissamut qanoq periarfissaqarnissaannut suliassaqarfimmut ilitsersummi nutaami tassani aalajangersimasumik assersuusiortoqarniartoq Ilaqtariinnermut Ataatsimiititaliap maluginiarpaa.

Sulisussarsiarineqarsinnaanermik oqariaaseq paasiuminartoq atorneqarnissaminilu ersarissarneqartoq ilitsersummi pingartinneqassaaq, taamaalilluni kommunini sulianik ingerlatsisunut tamanna ajornartorsiutaqqunagu. Ilitsersummi paasiuminaatsut, apeqquteqaatit nalornissutigineqartullu paasiniarneqarnissaat siunertaralugu Naalakkersuisoq KANUKOKA-mik piaartumik oqaloqateqaqqullugu Ilaqtariinnermut Ataatsimiititaliap kaammattorpaa.

Pisortanit ikorsiissuit pillugit maleruaqqusat tamanut assigiimmik atuutsillugit kommuninit aqunneqarnissaat kiisalu aalisartut piniartullu maleruaqqusat malillugit pisortanit aamma ikiorserneqarnissaat Naalakkersuisunut ilaasortap immikkut eqqumaffiginninnini attatiinnassagaa Ilaqtariinnermut Ataatsimiititaliaq kaammattuivoq.

Pisortat ikorsiissutaat pillugit malittarisassat atuuttut pillugit innuttaasunik piaartumik immikkullu paasisitsiniaasoqarnissaal Ilaqtariinnermut Ataatsimiititaliap inassutigaa. Aammalu pisortat ikorsiissutaat pillugit aalajangersakkat aalajangersimasut pillugit avinngarusimasuni nunaqarfinnilu Ilaqtariinnermut Ataatsimiititaliaq malillugu innuuttaasunut immikkut paasisitsiniaasoqartariaqarpoq.

Siunissami pikkorissartitsinerit nunap immikkoortuini ingerlanneqartassasut Ilaqtariinnermut Ataatsimiititaliap aammattaaq kaammattuutigaa, taamaalilluni maleruagassat nunap immikkoortuini najugaqarfinnilu aalaakkaasumik atuutsinneqarnissaat qulakkeerneqassamat. Malittarisassat assigiissaartumik malitsinneqarnissaasa qulakkeerneqarnissaai siunertalarugu periuseq tamanna pitsasutut pissarsinartutullu Ilaqtariinnermut Ataatsimiititaliap isumaqarfingaa taamaalillunilu assigiinngisitsisinnaaneq pinaveersaarmeqassalluni.

Siunnersuuteqartoq, partiit allat, KNAPK aamma KANUKOKA suleqataasimancerannik siunnersummilu uani ajornartorsiuutnik immikkoortumi allaffissornikkut assigiinngiaartunik aqutsinerit ilanngullugit isiginninniarsimancerannik Ilaqtariinnermut Ataatsimiititaliap qut-savigai.

Malittarisassat atuuttut malillugit innuttaasut sullinneqartarnissaat Ilaqtariinnermut Ataatsimiititaliap pingartippaa.

### **Inassuteqaat**

Taama paasinnilluni aalajangiiffigisassatut siunnersuut ilusimisut iluseqartoq Inatsisartut peqqussutaanni malittarisassat atuuttut allanngortinnejarnissaat pillugu siunnersummik aalajangersimasumik saqqummiussisoqannginera innersuussutigalugu itigartitsissutigineqassasoq ataatsimiititaliami amerlanerussuteqartut Inuit Ataqatigiinneersut Demokraatineersullu inassutigaat.

Ikinnerussuteqartut Siumumeersut ima oqaaseqarlutik siunnersuut akuersissutigineqassasoq **inassutigaat:**

Siumumi siunnersuuteqartoq isumaqatigaarput piniartut aalisartullu piffissap ilaani inuuniarnikkut ajornartorsiulerminni pisortanit ikiorserneqarsinnaanerisa pitsaanerulersinneqarnissaat siunertalarugu sulisoqarnissaanik Naalakkersuisut peqquneqarnissaannik siunnersuutaammat pisariaqartoq. Isumaqarpugut uteqattaarutigineqartuartoq tassalu piniartut aalisartullu pisortanit ikiorserneqarsinnaanerannut tunngasoq aammalu piffimmiit piffimmut assigiinngitsutigut

periuseqarfingeqartartup ikorsiissutinut peqqussutip ilitsersuusiornerinnaatigut qaangerneqarsinnaanngitsutut isumaqarfingatsigu.

Aalisartut piniartut nuliaasa aappaasalu meerartaqartut ilaqtariillu atugassaqartinnejnarerat inuuniarnerminni oqitsuinnaanngitsumik aporfeqartinnejtarerat isumaqarpugut annertusisamik pitsangorsaavigineqartariaqartut. Tamannalu qulakkeerniarlugu aaqqiissuteqartoqarnissaan anguniarlugu susassaqartut nuna tamakkerlugu ataatsimoortinnejarlutik piaartumik isumasioqatigiissinneqartariaqartut aalisartut piniartullu atugaat pitsaanerulersinneqarnissaat anguniarlugu, ilaqtigut aamma qaqlerlugin piginnittut inuttallu atugarisaat taakkunuunatigullu tigussaasumik pitsangorsaatissanik siunnerfeqarfiusumillu suliniartoqarnissaas pisariaqartutut isumaqarfingatsigu.

Siunnersuut taamatut isikkoqartillugu aammalu ataatsimiitaliami oqaaseqaativut ilanngullugit Siumumit akuersilluta taasissaagut.

Taama oqaaseqarluni Ilaqtariinnermut Ataatsimiitaliap siunnersuut inaarutaasumik aappassaaniigassanngortippaa.

Debora Kleist  
Siulittaasoq

Jane Petersen

Astrid Fleischer Rex

Ruth Heilmann

Aleqa Hammond